

closters kirchoff belaitten, vnd so der pfarrer mit seinen prediger ader capplanen allayne vnd ane andere von der pristerschafft zu sollicher leyche gefordert, sollen sie von der beleyttung ins closter nichts sonnderlichs fordern vber das ihene, das man yne, wan sie die leyche in die pfarkirchen beleytet, wie gewonlich gegeben hat, es wolten yne dan die lewte etwas auß guttem willen darumb gebenn, das sal zu der lewte andacht vnd guttem gefallen stehen. Vnd sol damit aller verdries, grain-schafft vnd widderwille, ob sich der zwuschen den gedachten pfarrer gardian vnd dem gantzen conuent des closters zu Dresdenn derhalben erhaben, gantz todt vnd absein, sundern yeder teyl sol dem andern freuntschafft, lieb vnd dinst ertzaigen vnd beweysen. Es haben auch vber vhorige mechtige hinstellunge die vetere vnd das gantze conuent Barfusser ordens alhie zu Dresden in beysein, mit rathe vnd vorwilligunge der wirdigen vnd hochgelerten vnnser lieben andechtigen hern Petri-fontini der heyligen schrift doctoris, hern Sebastiani Schubart lectoris vnd custodis Meysnischer prouincien vnd hern Joannis Konitzsdorff gardiani als yrer obersten vnd her Petrus Eysenberg auch der heyligen schrift doctor vnd pfarrer zu Dresden alle fur sich vnd yre nachkommelige diesen schiedt vnd machtspruch nuhe hinfur zu ewigen getzeytten stete vheste vnd vnuorbruchlich zuhaldenn bewilliget vnd angenhomen, alles trewlich vnd vngeferlich. Hirbey seindt gewest vnnser rethe vnd lieben getrawen her Seyffridt von Luttichaw ritter, her Dittrich von Werter, her Johann Kochel cantzler beyde doctores. Zw orkunde mit vnnserm hertzog Georgen zu Sachssen ꝛ vnd meyn Nicolai von Heynitz probsts vnd thumbhern obgenant anhangenden insiegeln besigelt. Gescheen vnd gegeben zu Dresden dornnstags nach Clementis anno ꝛ. XVIII^o.

Nach Cop. 82 fol. 243^b im K. Haupt-Staatsarchiv zu Dresden.

No. 407. 1527. 2. Apr.

Das Kloster verkauft sein Häuschen zu Pirna an den dortigen Rath.

Wir nachgeschribenn mit nhamen bruder Benedictus vom Lembergk der heyligen schrift lesemeister vnd mynister der prouincien von Sachssen vnd Slesien, Jacobus Suederich doctor vnd custos der custodien von Meyssen, Benedictus Dressler lesemeister gardian, Steffanus Snekoppff vicegardian, Johannes Sentiger vnd Caspar Wynther eldesten des conuents zw Nawdreßen Barfusser ordens mit disem vnßerm offenbriff vor vns vnd alle vnser nachkömeling bekennen, das wir mit zeitlichem rathe dem erbarn vnd namhafftigen dem radte zw Pynn — durch vnßerm anwaldt licentiatum Michaelem Rischenn altaristen zw Pynn vnßer hewsleyn daselbest zw Pynn am eck zwuechst magister Petzsch bey der badstuben gelegen erblich vorkawfft vnd dis vmb xxiiii β. vnd xxx gr. gegeben, sölchs auff tagzeit wie folgeth zw bezalenn. Nemlich hat vnser procurator her Fabian Flade heut entpfangen xii β. vnd xxx gr. vnd sol eyn erbar radt vns die hynderstelligen xii β. ostern auffß xxviii^{te} iar vnserm procuratori genetzlichen entrichten vnd vogenugenn. Vnd wir angeczeygten sie quitierenn vnd wöllenn eynem radt der wegen vor ider menniglich gewere seyn vnd bleyben. Des zw meher sicherheyte haben wyr vor vns vnd vnser nachkommende vnser des conuents insigel zw ende dißer schrift wissentlich druckhen lassen vnd geschehen zw Dresden dinstag nach Laetare anno ꝛ. im xxvii^{ten}.

Nach dem Orig. auf Papier im Rathsarchiv zu Pirna mit dem aufgedruckten Siegel.